

22. april 2024

UPA2024/161/97

**Nioqqutissanik eqqussuinermi akitsuutit pillugit Inatsisartut inatsisaata allanngortinneqarnera pillugu Inatsisartut inatsisaannut siunnersuut**  
(Aningaasaqarnermut Akileraartarnermullu Naalakkersuisoq)

**Nioqqutissanik eqqussuinermi akitsuutit pillugit Inatsisartut inatsisaata allanngortinnissaanut, taamaasilluni tipigissaatit, pinnerfaatit eqqiluisaarnermullu atortut eqqussineranut akitsuutaat (Akitsuutit normuat 090) peerneqarluni, Naalakkersuisut siunnersuummik saqqummiussaqaarnissaannik piumaffigineqassasut Inatsisartut aalajangiiffigisassaattut siunnersuut.**  
(Inatsisartunut Ilaasortaq Nivi Olsen, Demokraatit)

Siullermik Siumumiik Naalakkersuisut, Nivi Olsen- ilu siunnersuuteqarneranik qutsavingerusuppagut, akitsuutinik apparsaanerannut aammalu akitsuutinik piiaanerannut.

Siumumiik pingaartipparput akitsuutit inuiaqatigiit atungaat naapertorlugu nalimmassarneqartuartarnissaat. Tassami akitsuutit peqqissutsimut, pinaveersartitsineranut attuumassuteqarsinnaapput. Imaluunnit inuit kaasarfimminni aningaasaateqarnerulernissaannut tunngasinnaapput. Ilaatigut aamma avatagiisinut mingutsittinnginnisaaq tunngaviusarpoq imaluunnit orsussamik minguttiterisumik atuinikinnurunissamut aammalu soorlu qamutit angallatit eqqarsaatigissangaanni, kallerup inneranik motorilinnut nuukkiartuaarnissamut attuumassuteqarsinnaallutik.

Akitsuutit aamma aningaasat naleerukkiartornerannut sunniuteqartarput, tamannalu aamma nalilersungassaasarpoq. Tassami piffinni aningaasat naleerukkiartornerani, atuinerulerneq nioqqutissanik aaliangersimasunik, kinguneqarsinnaavoq aningaasat suli naleerukkiartulernerannik, taamaalilluni akikilliliinerungaluit sunniutaarussinnaallutik, immaqalu illuatungaatigut minguttiterinerulersimangutta, aamma eqqiaanissamut anigaasartuuteqarnerulerluta.

Naatsumik oqarsinnaavungut, sutigut tamatigut aningaasanut tunngatillugu iliuuseqassangutta, politikkeritut, innuttaasutullu nalilersuisariaqarpugut, atuinerpullu nalimmassarlugu.

Akitsuutinik piianeq Siumumiik tunngaviusumik isumaqatingaarput aammalumi innuttaasunut, niuertunut, inuiaqatigiillu aqqissuussaanerannut iluaqutaasinnaasut tamaasa qujaruppagut.

Siumumiik neriutugilluinnarparput aamma pisiniarfinni akinut sunniutaa ersersinneqarumaartoq, tassami akitsuuterpassuit piarpagut, isertitallu annaasagut neriuutingaarput atuisunut annerpaamik iluaqutaajumaartut.



Siumumiillu isumaqarpugut, niuertarfiit akitigut nalimmassaasarneri naammaginangippata, inatsisitigut allatut iliuuseqartariaqalissalluta, naak immaqa kiffaanngissusermut innarliisinnaangaluaq aammalu niuertarfiit killilersungaanninnerannut kinguneqarsinnaangaluaq. Aqqutissarli taanna neriuppugut tikittariaqassanngikkipput.

Siumumiik naak Nivi Olsen, Demokraatit siunnersuutaa akuersaarsinnaangaluarlugu, ingerlateqqinnissaa innersuutissanngilarput. Tassami Naalackersuisut suliaq tamanna aamma qulakkeermassuk.

Siumumiik naatsunnguamik taamatut oqaaseqarluta Aningaasanut Akileraartarnermullu ataatsimiisitaliamut suliassanngorlugu ingerlateqqipparput.

Qujanaq.

Kuno Fencker, Siumut